


彌勒菩薩所問經論

第四

二百十九
傳四

40952




元祿九年丙子二月日重修

皇圖環圖 帝齋須昌

佛日增觀 懋輪常轉

山城州天安寺法金剛院置

精舍



彌勒菩薩所問經論卷第四

傳

元魏天竺三藏法師菩提留支譯

問曰何故不說作不作相無作相決定何業
中有何業中無答曰唯除邪婬餘六業道中
悉皆不定此義云何若自作者成就作業及
無作業若使他作唯有不作不得有作於邪
婬中決定有作不得有不作何以故以此邪
婬畢竟自作無使他作是故經言頗有非身
作業而得成就殺生罪不答言有口使人作
成就殺罪又問頗有非口業作而得成就妄
語罪不答言有以身業作成就口業妄語之
罪又問頗有非身業作非口業作而得成就

身口業不答言有以依仙人瞋心故以唯欲
界色身善業道中畢竟有作及以無作禪無
漏戒無無作戒何以故以依心故中間禪不
定若深厚心畢竟恭敬心作身口業成就作
業及無作業若深厚結使心起身口業亦成
就作業及無作業若非深厚心非畢竟恭敬
心造身口業唯有作業無無作業若非深厚
結使心發身口業亦唯有作業無無作業而
方便作業心還悔者唯有作業無無作業問
曰於業道中何者是前眷屬何者是後眷屬
答曰若起殺生方便如屠兒捉羊或以物買
將詣屠所始下一刀或二三刀羊命未斷所

有惡業名前眷屬隨下何刀斷其命根即彼
念時所有作業及無作業是等皆名根本業
道次後所作身行行業是名殺生後眷屬業
乃至綺語皆亦是應知自餘貪瞋邪見等
中無前眷屬以初起心即時成就根本業道
故又身口意十不善業道一切皆有前後眷
屬此義云何如人起心欲斷此衆生命因復
更斷餘衆生命如欲祭天殺害衆生即奪他
物欲殺彼人復姪其妻生如是心還使彼妻
自殺夫主復以種種鬪亂言說破彼親屬無
時非實於彼物中生於貪心即於彼人復生
瞋心爲殺彼人故生如是邪見增長邪見以

斷彼命復欲殺其妻男女等如是次第具足
十種不善業道如是等業名前眷屬一切十
不善業道皆亦如是應知又離善業道非方
便修行善業道是方便以遠離根本故及遠
離方便故言方便者如彼沙彌欲受大戒將
詣戒場禮衆僧足即請和上受持三衣始作
一白詐第三白如是悉皆名前眷屬從第三白
至羯磨竟所起作業及彼念時起無作業是等
皆名根本業道次說四依乃至不捨所受善
行身口作業及無作業如是悉皆名後眷屬
問曰應說不善業道於五道中何道具足何
道不具足何道中多何道中少荅曰地獄有

五不善業道兩舌綺語貪瞋邪見此義云何
不殺害他故無殺生無他護心是故無盜無
護女人故無邪婬以無正心故無妄語以常
無有正念相故無破壞心故無惡口以常破
壞故依苦惱逼故有兩舌有非時說故有綺
語貪瞋邪見以畢竟有故名爲有非是現有
以是義故一處說有一處說無如北鬱單越
無前六種有後四種以命定故無有殺生以
無守護故無偷盜無護女人故無邪婬彼人
欲受婬欲樂時即捉女人將至樹下若樹曲
枝覆彼人者則行婬欲受婬欲樂若樹不覆
彼人慚愧即放而去非誑他心故無妄語以

常定心故無兩舌常柔輒語故無惡口以有
歌儻故有綺語餘意業者以畢竟有非是現
有又除鬱單越餘三天下受十業道北鬱單
越亦離不善業道畜生餓鬼欲界天中亦離
受十業道欲界中天離無受戒不善業道雖
天不殺天而天亦殺餘道衆生又有人言天
中亦有截手足等即時還生若斷其頭若中
間斷絕即死不生亦有殺他盜他物等不善
業道色無色天中無不善業道

問曰不善業道於諸道中各有幾種答曰地
獄北鬱單越無貪無瞋亦無邪見以畢竟有
非是現有餘三天下及欲界天離受法有受

法界欲界天有善無漏受法應知畜生餓鬼亦無受法色界天中有受法現前受善法攝取故又彼處所有聖人生者有依無漏善業道無色界中唯有心業道以成就業非是現有色界天中雖復成就非是現有彼處所有聖人生者一切現有以依無漏持戒力故

問曰應說十不善業道果及隨順因答曰有三種果一果報果二習氣果三增上果一一業道皆有三種此義云何具足十不善業道下中上生地獄中是名果報果習氣果者從地獄退生于人中依殺生故有斷命果依偷盜故無資生果依邪淫故不能護妻依妄語

故有他謗果依兩舌故眷屬破壞依惡口故
不聞好聲依綺語故爲人不信依本貪故貪
心增上依本瞋故瞋故增上依邪見故癡心
增上如是一切名習氣果增上果者依彼十
種不善業道一切外物無有氣勢所謂土地
高下雀鼠霄棘塵土晁氣多有虵蝎少穀細
穀少菓細菓及以苦菓如是一切名增上果
復有相似果殺者故與所害衆生種種諸苦
因彼苦故生地獄中受種種苦以斷他命後
生人中得短命報斷他煖觸是故一切外物
資生無有氣量如是一切十業道中隨義相
應解釋應知劫奪他物邪淫他妻雖不生他

重逼惱苦而破壞心是故受罪雖不破壞不
瞋不惡口而由惡心是故得罪

問曰故心起作一切惡行爲決定成就不善
惡業決定受彼惡道苦果爲不決定成就惡
業不決定受惡道苦果若諸惡業決定受者
惡道罪業不可得過此明何義以畢竟成就
惡道罪業墮惡道等除五逆業從無始世界
所習作業取惡道罪畢竟定者一切惡道不
可得過又空修梵行又與修多羅相違如如
來修多羅中說有人修習不善業道所得罪
報應地獄受彼人即於現身中受如是等若
彼五逆罪等果報畢竟在於地獄中受何故

說言惡道罪業可得迴轉云何而言惡道等
罪現身中受又復有過若地獄等惡道罪業
現身中受若如是者因果雜亂何以故以時
果輕重悉不定故

答曰有人言現身中受地獄罪者此人見實
諦故於現身中受少罪果而此義不然何以
故以業無自在故此明何義一切所作罪業
福業無自在力而隨何等因緣和合依彼因
緣應現身中受果罪業後身中受應後身受
果報罪業現在身受而有勝義若業應受樂
果報者則受樂果應受苦果則受苦果是以
依不定業故如是說又依不定相似業故作

如是說亦非依定果何以故以無得解脫果
故以阿羅漢受波羅提木叉戒禪定戒無漏
戒業乃至命未盡來常有不斷波羅提木叉戒
等若有果報則不得解脫是故現受不定業果
問曰若如是者諸業不定亦與修多羅相違
何以故以如來修多羅中說故作習業不受
果報無有是處而彼習業若現身中若後身
中畢竟定受答曰此義不然何以故以諸因
緣未和合故未受果報此義云何習作諸業
雖實能受現身果報而現不受何以故以諸
因緣未和合故猶如種子此明何義猶如種
子依於地等因緣和合能生牙等此亦如是

依於識住因緣和合業不淨識種子能生名
色牙等此明何義若依如實修行隨順如實
般若如實知有爲行斷諸煩惱時依聖道力
故修集諸功德能生善根牙彼時雖有受後
生業以其無有煩惱伴侶是故不能受後生
果以斷煩惱故雖復不受後身果報而猶依
彼不善業道於現身中少受習果故不畢竟
惡道中受如修多羅中如來說言應如是受
應如是受者此明何義雖少受喜樂雖少受
憂惱而善不善業即時受盡乃至少受頭痛
等苦此受少罪彼相似果向言修多羅相違
者此義不然何以故以依不定果報依未治

所治業修多羅中作如是說若畢竟定心作業不受果報無有是處此明何義阿羅漢人斷生後報罪福等業於現身中受報因緣不復和合若如是者彼阿羅漢依此業道可不入涅槃以是義故知汝不解如來所說修多羅意

問曰應說清淨不清淨戒去何清淨戒去何不清淨戒答曰有同戒清淨聲聞辟支佛菩薩同修五種清淨戒法應知何等爲五一者根本清淨二者眷屬清淨三者覺觀不亂四者攝取念五者迴向涅槃根本清淨者遠離根本業道罪故眷屬清淨者遠離殺生等方

便行故覺觀不亂者遠離欲害瞋恚等覺所
有惡行故攝取念者攝取念佛念法念僧等
諸念故迴向涅槃者為涅槃護戒不為世間
資生故此是少分同戒諸菩薩摩訶薩勝戒
者依初發菩提不損害心所起戒聚乃至八
地無量時修一切戒聚以利益他心迴向薩
婆若智離一切習氣得大涅槃是故諸菩薩
摩訶薩一切戒善清淨應知自餘依師教持
戒等皆不清淨

問曰持戒有幾種答曰略說則有一種持戒
依不損害心不顛倒心起身口業又有二種
一者受戒二者法戒又有三種謂學無學非

學非無學又有四種一者受波羅提木叉戒
二者禪定戒三者無漏戒四者遠離煩惱戒
波羅提木叉戒者所謂受世教戒如七衆所
受戒禪定戒者謂有漏所轉戒無漏所轉戒
無漏戒者謂學無學戒遠離煩惱戒者所謂
依厭欲事中間道所轉彼戒破戒及彼能起
破戒因緣煩惱對治又言有漏者依禪定戒
說言無漏者依無漏受戒說又有五種欲界
色界無色界作不作無漏不作復有六種不
貪等作戒三種差別無作三種差別復有七
種謂離殺生乃至綺語即此七種依作無作
差別有十四種即此七種依不貪等起有二

十一種即此七種依作無作差別有四十種
依刹那展轉差別有無量種

問曰何者是戒果答曰有漏定戒無漏定戒
彼屬界依屬界即如相應果應知無漏戒者
以離煩惱有二種果諸菩薩摩訶薩為薩婆
若持戒取佛菩提果離殺生等十善業道勝
果諸修多羅中如來廣說如彼一切修多羅
中應知如娑伽羅龍王所問經中如來說言
龍王離殺善男子善女人獲得十種離煩惱
熱清涼之法何等為十所謂一者施與一切
衆生無畏二者安住大慈念中三者斷諸煩
惱過患習氣四者取無病果五者種長壽種

子六者諸非人等常所守護七者睡寤安隱
八者不見惡夢離怨恨心九者不畏一切外
道十者退生天中是名十種離煩惱熱清淨
之法龍王若不殺善根迴向阿耨多羅三藐
三菩提者彼人得菩提時心得自在是故壽
命無量乃至正見道中皆應廣說如一切修
多羅中應知

成就捨心者問曰以何義故說持戒後次說
成就捨心答曰以見作他利益力故此明何
義以菩薩持戒依持戒故得生善道雖成就
捨心而無具足資生若尔不能作他利益又
復不能成就諸餘一切功德何以故爲他利

益攝取世間而彼菩薩利益他時離捨財物不能成就以是義故依他利益說持戒後次說成就捨心又復有義持戒捨心迭共相依乎爲利益以彼持戒能益捨心捨心亦能利益持戒以是義故次持戒後說成就捨心又離持戒故生惡道中捨心不能受持果報如相應果則不得能具足現前而持戒人生善道中捨心則能受於果報如相應果具足現前以是義故持戒持捨能作利益捨心亦能利益持戒以持戒人生善道處無資生故則爲貧窮苦惱所逼雖生善道即名惡道成就捨心生善道處於自利及他利因是故施能

利益持戒又以修行次第義故此明何義善
薩爲欲利益衆生修行義故如是次第欲自
取勤等口言功德先住持戒次後依於不損
害心起大慈悲心爲他作利益法施資生施
如彼衆生可化攝取又施等法能莊嚴戒故
此明何義菩薩摩訶薩以施等法莊嚴持戒
故能成就種種勝果如如來娑伽羅龍王所
問經中說龍王菩薩摩訶薩離殺生故能起
布施則得成就大富資生不可破壞得長壽
命行菩薩行過諸世間所惱惡事如是等龍
王十善業道亦復如是布施莊嚴十善業道
成就大利益持戒莊嚴十善業道成就一切

佛法願忍辱莊嚴十善業道成就三十二相
八十種好佛妙音聲精進莊嚴十善業道成
就佛法降伏一切諸魔怨敵思惟莊嚴十善
業道成就聞慧思慧修慧堅固清淨般若莊
嚴十善業道成就離諸邪見慈心莊嚴十善
業道成就不害一切衆生心悲心莊嚴十善
業道成就不捨一切衆生心喜心莊嚴十善
善業道成就遠離愛心憎心四攝莊嚴十善
業道成就教化一切衆生心

問曰捨義云何答曰對治貪著五陰及以資
生起慈悲心為攝受彼利益他行不著因果

筭法住持修行名爲捨義

問曰應說捨成就義云何菩薩捨成就答曰
菩薩遠離自取樂行名捨成就此義云何又
外道人求自取樂行於布施彼外道人爲自
身捨雖廣行施而爲愛境界心之所纏故果
報微薄又聲聞辟支佛人雖不求世間樂果
報事而心畢竟取於涅槃捨利衆生但取涅
槃樂是故施等業道功德雖少爲他而畢竟
自爲畢竟專念成就自身利益果報又菩薩
摩訶薩出過一切世間大士爲利益他發起堅
固大力之心起大悲柔軟所施最勝畢竟成就
又成就捨者有六種因何等爲六一者捨

身樂二者觀無衆生三者求無量佛法四者
攝取無量世住五者修集無量種種善根六
者不斷三寶以能成就無量果報是名菩薩
捨成就義應知又爲他利益一味心故此明
何義世間衆生多爲自身棄捨利益一切衆
生爲求自樂爲現受報爲未來果施與他物
若諸菩薩摩訶薩等爲利益他專心一味見
諸衆生貧無資財般若等法以是義故不著
因果依法施財施於現在世及未來世能與
衆生大利益事是故菩薩摩訶薩捨成就又
復以捨隨順義故此明何義布施等事隨順
攝取衆生行故則能攝取一切衆生作大劫

益事雖爲利益他事而外道聲聞辟支佛等
棄捨利益一切衆生唯爲成就自身利益菩
薩摩訶薩依大慈悲心起樂利益他衆生行
如菩薩所求如是成就以是義故名捨成就
又以依於取佛菩提起心義故此明何義以
菩薩摩訶薩爲與一切衆生樂故自求佛菩
提起於捨心見諸衆生墮墜惡趣我於現在
及未來世今諸衆生離苦惱事是故菩薩其
心日夜轉轉爲欲利益衆生名捨成就又以
能攝取種種果故此明何義以諸菩薩爲欲
利益一切衆生種種布施於現在世及未來
世爲欲攝取一切衆生取種種果是名菩薩

捨成就如無盡意修多羅中說求飲食者施
與飲食爲命爲樂爲辯爲色及以爲力如是
等皆悉施與又爲遠離邪命自活求資生故
此明何義以諸菩薩布施波羅蜜相違之法
貪求資生邪命自活等皆悉遠離如無盡意
修多羅中說菩薩摩訶薩無顛倒邪命追求
資生等布施

問曰應說清淨不清淨捨去何清淨去何不
清淨答曰菩薩摩訶薩依自心清淨布施清
淨如如來修多羅中說有四種清淨布施何
等爲四謂有布施從施主清淨非是受者如是
等於彼四種清淨施中所謂施主清淨非是

受者是名菩薩摩訶薩清淨施又從施者受者清淨亦名菩薩清淨之施何以故以諸菩薩施與他物不求果報即能施與一切衆生又求布施果報者彼人於受者邊求清淨而菩薩離果報故一切時自身心清淨以心清淨故施清淨又以遠離忽然施等此明何義以如來修多羅中說有九種施一者值施二者畏懼施三者報恩施四者求恩施五者學父母施六者爲生天施七者爲名稱施八者爲莊嚴心施九者眷屬法施爲修行功德爲得上義施值布施者謂得值福田求多果報故又值施者謂近眷屬名值布施畏懼施者

見一切物無常敗壞寧用布施故報恩施者
謂報恩相施彼先施我我應還施求報恩施
者謂求後時報恩故施學父母施者謂著過
去修行起如是心我父母精進常行布施我
亦如是行於布施故爲生天施者謂求天中
五欲境界故爲名稱施者爲令四方沙門婆
羅門等知而施故如是七種施爲智者所呵
以不清淨故又聲聞辟支佛人離世間樂求
涅槃樂如是布施亦非清淨又菩薩摩訶薩
不著自樂唯求諸佛菩提心施於諸施中最
勝清淨是名菩薩施清淨又以如實知有爲
行體故此明何義以諸凡夫取著虛妄戲論

我相心顛倒故唯求五欲樂境界事以離慧
眼以爲愛等諸煩惱垢之所染汙捨不清淨
菩薩摩訶薩如實知見有爲行體虛妄不實
是故遠離我見等相及能遠離五怖畏故無
有內外可施之物不能捨者以爲求他利益
所縛及能遠離自求樂等垢汙之法以是義
故名捨清淨又以空觀觀所起故此明何義
以諸菩薩空觀等觀觀施等法以是義故名
捨清淨如無盡意修多羅中如來說言以觀
空觀觀起布施以是義故施不可盡如是等
問曰應說布施差別之相荅曰略說則有一
種布施謂不貪心相應心施復有二種一見

受者二不見受者不見受者如置物火中及
恒河中又見施主者有施有布施彼亦有二
種謂染不染染者謂家法飲食及姪女人莊
嚴具施是名染施不染施者謂施貧窮孤獨
人等是不染施復有二種施謂法施資生施
法施者謂離供養恭敬等心於法中法想遠
離愛心及顛倒心說修多羅等是名法施復
有三種施即此二種加無畏施無畏施者作
如是言汝莫怖畏汝莫怖畏又無畏施者見
諸衆生種種怖畏施與無畏此義云何謂見
他畏起與現世及未來世無怖畏心而口說
言汝莫怖畏汝莫怖畏我爲汝作如是如是

方便隨何等方便與汝畢竟無畏之處名無
畏施彼怖畏者如貧窮人受於苦惱此怖畏
者亦復如是以與無畏對治法故復有四種
施即向三種復有大施言大施者謂受持五
戒此是如來所說大施以能授取無量衆生
故成就無量衆生樂故資生飲食用布施者
不能廣作利益衆生受持五戒能作利益以
能盡形受持五戒念念增長種種功德以依
止彼根本心故諸功德聚乃至命根不斷絕
住復有四種施此四種施略有二種一者不
淨二者淨不淨中有二種差別何等爲二一
者怖畏施二者求報恩施以何義故名爲不

淨如世間田以爲荆棘惡草等覆故名不淨
此亦如是以怖畏故求報恩故名不淨施淨
中亦有二種差別何等爲二者敬重心施二
者慈悲心施除此四種更有上上勝施如偈言
下有求資生 下下怖畏施 智者敬重施
勝智慈悲施

復有四種施何等爲四一者自利益施非他
利益二者他利益施非自利益三者俱利益
施四者俱無利益施自利益施非施利益者
謂凡夫聖人伏離煩惱或有非是伏離煩惱
或時施與諸佛如來或時施與形像塔廟是
名自利益施非他利益施他利益施非自利益

者謂阿羅漢阿那含等除爲現果施與衆生
是名他利益施非自利益俱利益施者謂施
伏離煩惱凡夫或未伏離煩惱凡夫是名俱
利益施俱無利益施者除爲現果謂阿羅漢
阿那含等爲塔廟施是名俱無利益施又復
略說諸菩薩摩訶薩有四種施悉能攝取一
切善根何等爲四一者平等心施二者對治
施三者迴向大菩提施四者依寂滅施如是
諸菩薩摩訶薩爲滿足檀波羅蜜故如是布
施應知

問曰應說布施果云何布施果答曰略說布
施有一種果所謂受用復有二種果所謂現

在受果未來受果復有三種果。即此二種復加般若復有四種果。何謂四種。一者有果而無用。二者有用而無果。三者有果亦有用。四者無果亦無用。有果而無用者。謂不至心施。不自手施。輕心布施。彼如是施。雖得無量種種果報。而不能受用。如舍衛天主。雖得無量種種珍寶。而不能受用。有用而無果者。謂自不施。見他行施。起隨喜心。以是義故。雖得受用。而自無果。如天子物。一切沙門婆羅門等。雖得衣食。及以受用。而自無果。又如轉輪聖王。四兵雖得衣食。而不得果。有果亦有用者。謂至心施。不輕心施。如樹提伽諸長者等。無

果亦無用者謂布施已因即滅盡或爲出世
聖道障故猶如遠離煩惱聖人復有五種果
謂得命色力樂辯等如如來修多羅中說因
食得命是故施食即是施命以是因緣後得
長命如是施色施力施樂施辯才等皆亦如
是復有五種勝果所謂施與父母病人法師
菩薩得勝果報父母恩養生長身命是故施
者得勝果報又病人者孤獨可愍以是義故
起慈悲心施病人者得勝果報又說法者能
生法身增長法身示導善惡平正非平正顛
倒非顛倒是故施者得勝果報又諸菩薩等
悉能攝取利益衆生故以快心故心無因緣

而能發起慈悲心故以攝取三寶不斷絕因
故以是義故施菩薩者得勝果報復有五種
果即現身得何等爲五一者入慈三昧二者
入無諍三昧三者入滅盡定四者見道五者
阿羅漢果若布施者即得果報入大慈定者
能發心與無量衆生安隱之樂以與無量衆
生樂故名爲慈心以是慈心勤修自體是故
初起慈心三昧即布施者得現果報又入無
諍三昧者悉能防護一切衆生諸煩惱心以
廣攝取利益衆生勤修自體是故初起無諍
三昧即布施者得現果報又入滅盡定者則
能攝取無量功德以取無量功德勤修自體

有施心而無財物可以布施是故起心爲欲
成就資生大富施與衆生依此施故怨親平
等攝取利益是故菩薩見依布施故得成就
無量福德一者能攝取怨二者恒常給濟一
切衆生衣食等物三者心不怯弱四者餘親
不欺五者常爲衆人敬信尊重六者一切眷
屬信受其語七者入大衆時心無怖畏八者
一切怨敵不能傷害九者親屬歡喜十者現
果資生常有不空十一者常爲他求十二者
所作已辦十三者情所愛敬常自圍繞十四
者所不愛敬皆悉遠離十五者所有成就世
間出世間利益勝事常爲一切親屬所愛十

六者若無利益一切諸親則懷憂惱十七者
護一切惡十八者自令安住諸善法中十九
者見他神通心不欣尚二十者恒常讚歎一
切功德二十一者覆蔽諸過二十二者棄捨
一切非丈夫相二十三者成就一切大丈夫
相二十四者無有貧窮下賤乞人看施主眼
二十五者一切求心稱事滿足是故菩薩摩
訶薩深見布施有如是等無量功德爲欲利
益一切衆生自能成就如是力故信喜布施
以依信喜行布施故則能滿足檀波羅蜜
問曰爲從勝心成就清淨布施果報從勝福
田成就清淨布施果報答曰有人言從勝心

故成就清淨布施果報何以故現在施事是
一而果報差別猶如種子此義云何猶如種
子地等是一而依種子見有勝果如是施物
是一而依勝心乃至施畜生等以心力故得
人天果報轉輪聖王聲聞辟支佛佛菩提果
以是義故依於勝心得勝果報是故得知勝
心爲重此復何義若施事是重依事故成就
清淨施果報者離重施事以慈悲心施與畜
生施與福田如布施佛不應成就清淨施果
又若離快勝尊重心等布施如來應得成就
清淨施果而實不成以是義故成就清淨布
施果報心爲勝因而施事福田能生勝心依

此義故如來經中讚歎福田復有人言依勝
福田依重施事成清淨果何以故以聞布施
不知福田得勝果報此明何義不識佛等功
德福田布施佛等得勝果報如有獼猴施如
來蜜及婆私吒迦尸迦等又如女人愛念心
故以諸幡蓋及華鬘等本心實欲供養見塔
而實供養辟支佛塔謂是見塔從辟支佛得
無量福不從本心見邊得福如是等以是義
故從勝福田及以重事得勝果報不從心得
故知福田施事爲重又有人言不知福田無
福田事不得成就清淨施果如有一人施尼
乾子生羅漢想而不成就清淨果報又有人

言心以福田及施事等三種和合此明何義
若布施者從所尊重起布施心知福田等無
量功德值遇諸佛如來福田或時值遇如來
弟子從尊重心起布施心所可施物是難捨
事能捨布施三種和合方得成就清淨果報
而心爲重以是義故此三種中唯心一種爲
重爲勝

是能捨主是能施主者問曰捨主施主有何
差別荅曰有乞求者持他物施是能施主持
自物施是能捨主又有人來乞持自物施是
能施主若人發心求貴重物而口不言知心
即施是能施主又布施物時慳心數數中間

隔起是能施主若無慳心數數起者是能捨
主又雖施他物以慳心故自求果報是能施
主若施他物不以慳心專求自果是能捨主
又離喜等心而行布施是能施主共歡喜心
於三時中不悔心施是能捨主又若求未來
勝果報者是能施主離世間報求涅槃果是
能捨主又若施求於現在未來及涅槃果是
能施主若發心求大菩提果唯大悲心施與
衆生是能捨主

成就善知迴向方便者問曰何故說戒施後
次說善知迴向方便答曰爲欲示現異道功
德故此義云何外道人等求自樂故修戒施

等迴向三有又聲聞人辟支佛等亦自爲身
求涅槃樂修戒施等迴向涅槃諸菩薩摩訶
薩爲利益他求大涅槃以慈悲心一味等味
與衆生樂修戒施等迴向無上大菩提果以
戒施等同彼外道聲聞辟支佛是故如來示
現迴向勝道功德說戒施後次說善知迴向
方便又修戒施等貪著世間樂果報心難可
防護是故如來說戒施後次說善知迴向方
便此明何義以戒施等非三昧行唯取欲界
天人之中淨妙色等境界果報而彼淨妙色
等境界雖作心護貪等煩惱不可得離何以
故以於過去無始世來習貪愛爲染等境界

以心取彼色等境界難防護故而諸菩薩彼時修行地方便法即於彼時雖復未離貪等煩惱而修戒施貪等煩惱不能染心又為斷疑是故如來說戒施後次說善知迴向方便此示現何義世間有人疑於菩薩不離煩惱修戒施等以利根故觀有為法一切皆悉苦空無常修戒施時貪等煩惱為染菩薩不染菩薩為斷彼疑菩薩亦時為欲利益一切眾生捨自利益乃至不求轉輪王處樂果報事唯為一切眾生樂故求佛菩提所有善根迴向涅槃以是義故菩薩雖復未離世間一切世間所有過患不染菩薩又依清淨戒迴向

清淨故此明何義以依清淨持戒之力是故
能捨以捨力故諸所求法皆悉成就是故如
來說戒施後次說迴向方便是故如來修多
羅中說持戒人所願所作皆悉成就何以故
戒清淨故

彌勒菩薩所問經論卷第四

傳

